

Ekonomi Malaysia semakin bergantung 'kitaran AI'

Wujud risiko baharu jika permintaan teknologi global mula melemah

Oleh Mahanum Abdul Aziz
mahanum_aziz@bh.com.my

Ledakan semikonduktor dipacu kecerdasan buatan (AI) semakin muncul sebagai antara pemacu penting pertumbuhan ekonomi

Malaysia pada 2026, tetapi kekuatan sama turut mewujudkan risiko baharu sekiranya kitaran permintaan teknologi global mula melemah.

CGS International Securities Malaysia Sdn Bhd (CGS International) berkata, pertumbuhan pesat permintaan semikonduktor berkaitan AI terus mempercepat eksport elektrik dan elektronik (E&E), sekali gus menyokong sektor pembuatan serta industri berkaitan.

Firma penyelidikan itu menaikkan unjuran pertumbuhan Keluaran Dalam Negara Kasar (KDNK) Malaysia bagi 2026 kepada 5.5 peratus daripada 5.0 per-

tus sebelumnya.

"Ledakan semikonduktor dipacu AI terus mendorong peningkatan mendadak eksport E&E, menyokong pertumbuhan sektor pembuatan dan industri berkaitan," katanya dalam nota.

Eksport bersih Malaysia melonjak sebanyak 168.5 peratus tahun ke tahun kepada RM15.76 bilion pada suku kedua 2026, berbanding peningkatan 13.5 peratus pada suku pertama 2026.

Eksport dan import kedua-duanya mencatatkan pertumbuhan dua angka, masing-masing meningkat sebanyak 17.0 peratus dan 13.9 peratus dari tahun ke tahun berbanding 5.2 peratus dan 4.6 pe-

ratus pada suku pertama 2026.

Permintaan E&E kukuh

Peningkatan itu disokong perdagangan barangan dan perkhidmatan lebih kukuh, dengan permintaan E&E yang kukuh terus menyokong prestasi eksport.

Mengenai prospek eksport Malaysia, CGS International menjangkakan prospek kekal menggalakkan di tengah-tengah kitaran naik semikonduktor yang dipacu AI yang berterusan.

Ia berkata, World Semiconductor Trade Statistics mengunjurkan pasaran semikonduktor global 2026 akan berkembang sebanyak kira-kira 108 peratus

tahun ke tahun.

Di samping itu, Indeks Pengurus Pembelian (PMI) Pembuatan Global S&P Malaysia terkini pada 26 Julai menunjukkan permintaan yang baik untuk pengeluar berorientasikan eksport Malaysia.

Menurutnya, jumlah pesanan baharu berkembang pada kadar terpanas dalam tempoh lapan bulan.

Mengenai risiko kitaran teknologi, ia berkata, sebarang penyederhanaan dalam permintaan semikonduktor berkaitan AI atau kelewatan dalam pelaburan pusat data boleh menjejaskan prestasi eksport Malaysia.